



Pareri dal president

Caras commembras, stimai commembers

Il coronavirus ha mess ils davos dus onns enqual' uniun en pitgiras, gie entginas ein historia, existan buca pli.

E l' Uniun Rumantscha Rezia Bassa, co ha tala surmuntau quei temps malguess e malemperneivel?

Cumpargliu cun ils onns avon la pandemia fa ei da basegns da differenziar in techet igl engaschi dallas commembras e dils commembers. D'ina vart ha la partizipaziun allas paucas sentupadas che nus havein insumma astgau orgnizar il davos temps – priu ora la raduononza generala – magari pitiu empauet. Tgei che fa plascher ei da l'otra vart che las activitads dil chor maschadà ein perencunter stadas, schi lunsch ch'il virus ha schau tier ei, frequentadas fetg bein.

Lein far in cuort sguard anavos:

Sentupadas:

L'entschatta dallas activitads, suenter la liunga pausa sfurzada entras il Coronavirus, ha l'uniun fatg cun la radunonza generala il davos d'uost a Jenins. En la sala dil hotel Zur Bündte ha il president Rinaldo Caduff astgau beneventar passa la mesadat dils varga 90 commembers e commembras, in bi diember en vesta dalla situaziun aunc adina buca gest ideala per sentupar. Entschiet ha la radunonza cun in apéro ed in schatg musical dalla cantadura Angela Kilchör da Wetzikon ch'ei vegnida accompignada dalla cellista Mirelle Steiner. Naturalmein ha era il Chor Rumantsch Rezia Bassa sut la bitgetta da Monika Arpagaus buca schau prender da cantar duas bialas canzuns. Ins ha strusch sentiu che la davosa prova da cant schai gia varga in onn anavos, schi bein ha ei tunau. Suenter ina stupenta tscheina ord la cuschina dil Luzian Spescha ch'ei, tgei che sauda tier in romontsch en la diaspora, naturalmein era commember dall'Uniun Rumantscha Rezia Bassa, ha il president puspei surpriu la bitgetta e menau atras la radunonza. Sper las tractandas usitadas ei l'elecziun dalla suprastonza nova stada el center. La proposta dalla suprastonza d'alzar il diember da tala da 3 sin 5 commembers ei vegnida aprobada senza cuntervuschs dalla radunonza. Il president Rinaldo Caduff, l'actuara Lea Killias ed ils dus revisurs Andrea Dellner e Lucas Caviezel ein vegni reelegi cun resultats sorprendents ed era ils treis novs han para fatg buna impressiun als commembers ed ein vegni elegi unanimamein. Da niev ha Sandro Caduff surpriu igl uffeci da cassier, quei da Retus Spescha che haveva demissiunau, Fidelia Staub e Carin Deplazes ein las novas suppleantas. La maioritad dalla suprastonza ei ussa feminina, vul dir, l'uniun romontscha ha absolut negin

problem da quotas pli, anzi, el futur vegnan ils umens tgunsch a stuer cumbatter cun mauns e peis per era vegnir mintgaton tiel plaid.

Il settember ha ei lu giu num da metter si scussal ed ir puspei ad Unterterzen en cuschina. Durent treis seras han ils participonts dil cuors da cuschanar, ch'ei vegnius organisaus gia per la tiarza gada dall'uniun Rumantscha, astgau crear bunas e differentas spisas. Antipasti, tapas e variaziuns da zetga ein stadas ils temas ch'il menader dil cuors Retus Spescha ha mess sil plan da menu uonn. Resumau astgan ins tuttavia menziunar : Igl ei plitost stau in «cuschanar en legra cumpagnia» e buc dispet in cuors da cuschanar, ein ils participonts per gronda part gie cuschaniers e cuschanieras da vaglia, aschia ni aschia, stau eis ei puspei fetg bi e cloma per ina continuaziun in auter onn.

Fetg biala ei era la sentupada d'atun fin settember sil Lanaberg stada. Era sche l'aura ei vegnida suenter miezdi vi empauet pli brutta, ein ils viandonts stai adina da buna luna e han gudiu la cumpagnia romontscha. Naturalmein ha era il bien e fetg picant gentar sil Lanaberg, cuschanaus dil commember Toni Valaulta e team, susteniu la buna luna e procurau als ustiers ina pulita sviulta da vin tshietschen e must.

Che la sentupada rumantscha cun lotto ha gia dapi biars onns tradiziun, quei sa da l'ura enneu mintga commember, mintga commembra da noss'uniun, la viseta dalla via d'Advend a Quinten perencunter ei stada ina premiera. Igl anim dils participonts ei en tut cass staus fetg gronds ed ins astga tuttavia resumar che omisduas sentupadas ein bein reussidas.

La sentupada da primavera che ha menau nus il matg 2022 ella posta veglia a Weisstannen ed era il viadi en Surselva, nua che nus havein visitau fin zercladur il luvratori historic a Mulin Strada, ein stei fetg interessants e havessan fadigiau dapli che mintgamei ferm 20 participonts. Spezialmein la guida dad Ueli Giger a Strada, che ha tuttina cuzzau in'ura e mesa, ha incantau tuts talmein che nus havessan aunc pudiu tedlar ditg sias explicaziuns fetg interessantas e divertentas.

Chor maschadà Rumantsch:

Actualmein dumbra l'Uniun Rumantscha Rezia Bassa rodund 90 commembras e commembers, 40 da quels contan era el chor dall'uniun. Malgrad la situaziun buca gest ideala ha il chor mischedau entschiet cun las provas da cant miez settember, quei cun la finamira da saver cantar ils 14 da november en baselgia a Maiavilla sin in nivel andant e che po satisfar allas pretensiuns pulit aultas dalla dirigenta Monika

Arpagaus. Duront il survetsch divin ella baselgia reformada ha il chor lu cantau entginas canzuns romontschas, quei per plascher dils auditurs. Schegie che la mimica dalla dirigenta ha schau intraveder ch'il cant ei nuota adina staus suenter siu gust, ein las cantaduras ed ils cantadurs perencunter stai cuntents cun lur presentaziun.

Fetg cuntents astgein nus esser cun ils dus concerts all'entschata avrel 2022 ad Aschera ed a Ragaz Bogn, ein els tonaton stai in success cumplein. Ils numerus auditurs, spezialmein a Ragaz Bogn cun biabein 400 persunas, han schau plascher fetg las producziuns dil chor Rumantsch e dils dus cors hospitants, il chor viril d'Aschera ed il Pajazzo Chörli. Tgei che nossas dunnas e per part era umens han creau per il buffet per igl apéro suenter il concert san ins numnar fenomenal, ei semplamein stau grondius. Vegn vitier ch'il concert a Ragaz Bogn ha era procurau che la cassa dall'uniun ei vegnida emplenida considerablamein. Capiala ed in grond Diespaghi a tuts participonts.

Il cuort sguard anavon:

Jeu selegrel gia fetg sin nossa proxima sentupada, la radunonza generala a Vilters, e sperel che biaras commembras e biars commembers suondian agl invit dalla suprastonza. Cun Pascal Gamboni eis ei reussiu da carmalar in fetg enconuscent musicist e cantadur a Vilters. El vegn a delectar ils presents duront igl apéro cun in bi schatg musical. Ei ha semussau ils davos onns che la radunonza generala ei buca sulettamein cheu per luvrar giu las tractandas usitadas e screttas avon ellas statutas, mobein ei prinzipalmein ina fetg beinvegnida e divertenta sentupada dalla famiglia rumantscha ella diaspora.

Era il program da sentupadas dil secund miez onn empermetta ina ni l'otra occasiun ideala per guder entginas bialas uras en buna cumpagnia. Cun la meisa rumantscha, il cant liber rumantsch el settember ed il turschar pasta e far mams/creflis el december empruvein ora enzatgei niev, ferton ch'ils ulteriurs eveniments, sco per exempel la viandada d'atun, la sera da cuschanar, la sentupada rumantscha cun lotto ein secumprovei pulit ils davos onns.

Sche cantaduras e cantadurs suondan miu clom, serenda il chor ils 13 da november a Weesen e conta leu, comunablamein cun il chor baselgia da Quarten, nua che jeu sundel medemamein president, a caschun dil patrozinium. Previu ei da cantar la Missa Dona Nobis Pacem da Gion Balzer Casanova. Vinavon lessan era mussar al pievel giudem il Lac Rivaun, cun cantar entginas canzuns rumantschas, con bi che nies lungatg mumma tuna. Las provas da cant entscheivan puspei, suenter las vacanzas da stad, ils 12 da settember a Ragaz Bogn, cantaduras e cantadurs novs ein fetg beinvegni.

Caras commembras, preziai commembers, engraziel fetg per vies grond sustegn el vargau e buca emblidei, noss'uniun exista vinavon sulettamein grazia a vus e grazia a vossa beinvulientscha e stedia partizipaziun allas sentupadas. Aschia gideis vus era da promover e mantener il bi lungatg Rumantsch.

Mols, il fenadur 2022, vies president

Rinaldo Caduff